

**NAŠA
STRANKA**

ODBOR ZA STATUT NAŠE STRANKE

*Na osnovu čl. 13. i 14. Zakona o političkim organizacijama (Službeni list BiH, br. 27/91),
Kongres Naše stranke održan u Sarajevu, 18.05.2019. godine, d o n i o j e:*

STATUT

POLITIČKE ORGANIZACIJE GRAĐANA „NAŠA STRANKA“

(Novi prečišćeni tekst sa izmjenama i dopunama Statuta usvojenim na Petom redovnom kongresu Naše stranke održanom 10.06.2023. godine i na Trećem vanrednom izbornom kongresu Naše stranke održanom 11.10.2025. godine)

I. OPĆE ODREDBE

Član 1.

(Predmet statuta)

- (1) Statutom Naše stranke (u daljem tekstu: Statut) utvrđuju se: Ciljevi političke organizacije i načini njihovog ostvarivanja; Naziv i sjedište; Unutrašnja organizacija; Uslovi i način za učlanjivanje i prestanak članstva, kao i prava, obaveze i odgovornosti članica političke organizacije; Organi političke organizacije i njihova prava, obaveze i odgovornosti; Zastupanje i predstavljanje političke organizacije; Način sticanja, korišćenja i raspolaganja sredstvima političke organizacije; Način obavještanja javnosti o radu i sticanju sredstava političke organizacije; Način odlučivanja o udruživanju u saveze i druge oblike udruživanja političkih organizacija; Način donošenja statuta; Način donošenja odluke o prestanku rada političke organizacije.
- (2) Izrazi koji se koriste u ovom Statutu, a koji imaju rodno značenje, bez obzira jesu li korišteni u muškom ili ženskom rodu, obuhvataju na jednak način sve rodove i rodne identitete.

Član 2.

(Pravni status)

- (1) NS je pravno lice, upisano u registar političkih organizacija koji se vodi pri nadležnom državnom organu. Stranka ima svoj žiro račun i devizni račun, a u pravnom prometu s trećim licima za preuzete obaveze odgovara vlastitim sredstvima, tj. imovinom.
- (2) Teritorijalne organizacije i tijela NS-a djeluju na osnovu ovlaštenja i nemaju status pravnog lica.

Član 3.
(Naziv i sjedište)

- (1) Puni naziv stranke je Naša stranka, a skraćeni naziv NS.
- (2) Odluku o promjeni naziva stranke donosi Kongres NS-a.
- (3) Sjedište NS-a je u Sarajevu, ulica Branilaca Sarajeva 5. Odluku o promjeni adrese sjedišta Stranke donosi Predsjedništvo NS-a.

Član 4.
(Načela djelovanja)

- (1) NS je stranka građanske orijentacije, koja djeluje na osnovu odredaba ovoga Statuta i stranačke politike izražene u programima, deklaracijama, rezolucijama i odlukama, te drugim općim i pojedinačnim aktima, u skladu s pravnim poretom Bosne i Hercegovine.
- (2) NS ostvaruje svoje ciljeve zakonitim, demokratskim i nenasilnim metodama parlamentarnog i javnog djelovanja.
- (3) NS je politička organizacija socijal-liberalnog političkog opredjeljenja, koja uvažava najviši stepen ravnopravnosti građana i građanki Bosne i Hercegovine.
- (4) NS djeluje i radi na principima ostvarenja jednakih prava i jednakih prilika za sve građane i građanke Bosne i Hercegovine, u skladu sa Zakonom o zabrani diskriminacije Bosne i Hercegovine.
- (5) NS u svom djelovanju preduzima konkretne korake s ciljem ohrabriranja ugroženih i diskriminiranih osoba i skupina na političko učešće. NS će osigurati mehanizme neophodne za povećanje zastupljenosti i učešća žena i mladih, te drugih manje zastupljenih kategorija, u organima stranke i političkom djelovanju.
- (6) Tamo gdje je to tehnički moguće, NS će pri popunjavanju mjesta u tijelima stranke osigurati ravnopravno učešće žena i muškaraca. U ostalim slučajevima, NS će uložiti najveće napore da se postigne rodna ravnopravnost u svim tijelima stranke.

Član 5.
(Predstavljanje i zastupanje)

- (1) NS u javnom i političkom životu, te u pravnom prometu zastupa predsjednica NS-a.
- (2) Potpredsjednici NS-a i Generalna sekretarka NS-a predstavljaju i zastupaju NS na temelju odluke predsjednice NS-a, a u skladu sa odredbama Statuta.

Član 6.
(Područje djelovanja)

- (1) NS djeluje na području države Bosne i Hercegovine.

- (2) NS može sarađivati s drugim političkim organizacijama u Bosni i Hercegovini i inozemstvu radi ostvarivanja svojih političkih ciljeva.
- (3) NS se može učlaniti u međunarodne političke i nepolitičke asocijacije.
- (4) Odluke iz stava 3. ovoga člana donosi Glavni odbor NS-a uz prethodno obavljenju raspravu u lokalnim i regionalnim/kantonalnim odborima i Predsjedništvu NS-a.

Član 7.

(Pečat, znak i zastava)

- (1) NS ima svoj pečat, znak i zastavu.
- (2) Pečat NS-a je okruglog oblika, promjera 30 mm, s latiničnim i ćiriličnim natpisom „NAŠA STRANKA“, koji prati rub pečata. U sredini pečata nalazi se znak NS-a.
- (3) Pravilnik o izgledu i upotrebi pečata donosi Predsjedništvo NS-a.
- (4) Izgled znaka i zastave NS-a utvrđuje se odlukom Glavnog odbora NS-a.
- (5) Originalni uzorak znaka i zastave pohranjen je u Sekretarijatu NS-a.

Član 8.

(Izdavačka djelatnost i stranačka glasila)

- (1) NS može imati vlastitu izdavačku djelatnost i stranačko glasilo, koje može biti u štampanoj i elektronskoj formi.
- (2) NS može izdavati i druga glasila, te osnivati ili se koristiti i ostalim sredstvima javne komunikacije (internet, televizija, radio i sl.) u skladu sa zakonom i Statutom.
- (3) NS ima zvaničnu jedinstvenu web-stranicu registrovanu na domeni www.nasastranka.ba.
- (4) NS ima obavezu da sve izabrane predstavnike i predstavnice ravnomjerno predstavlja putem javnog oglašavanja i komunikacije u javnosti.
- (5) Predsjedništvo NS-a donosi odluku o formiranju i načinu rada glasila NS-a.
- (6) Biti će uloženi svi napor da se, po potrebi, svi materijali prilagode osobama s invaliditetom.

Član 9.

(Način i postupci izbora i imenovanja)

- (1) Izbor članica organa NS-a, kao i imenovanje članica u tijela NS-a, obavlja se glasanjem u pravilu između više kandidatkinja.
- (2) Izbor članica organa NS-a obavlja se tajnim glasanjem.

- (3) U slučaju kada na području određene lokalne ili regionalne organizacije ne postoje organi NS, Predsjedništvo imenuje povjerenicu na period ne duži od šest mjeseci. Ako se u roku od šest mjeseci ne izabere organ NS-a, Predsjedništvo može imenovati organ lokalne ili regionalne/kantonalne organizacije, uz saglasnost Glavnog odbora ili produžiti mandat povjerenice na dodatna tri mjeseca. Ukoliko se ni u dodatnom roku od tri mjeseca ne izabere organ NS-a, tada Predsjedništvo, uz saglasnost Glavnog odbora, imenuje organ lokalne ili regionalne/kantonalne organizacije.
- (4) U postupku izbora članica organa NS-a, kao i u postupku imenovanja članica u tijela NS-a za koja je predviđen izbor ili imenovanje samo jedne članice, neophodna je natpolovična većina glasova prisutnih.
- (5) U slučaju da u postupku izbora iz prethodnog stava u prvom krugu glasanja nema natpolovične većine, pristupa se drugom krugu glasanja, gdje se glasa za jednu od dvije kandidatkinje koje su osvojile najveći broj glasova u prvom krugu. Za izbor je potrebna natpolovična većina glasova prisutnih.
- (6) U postupku izbora članica organa NS-a, kao i u postupku imenovanja članica u tijela NS-a za koja je predviđen izbor ili imenovanje više članica, izabranim se smatraju one kandidatkinje koje su dobile najveći broj glasova.
- (7) U slučaju da u postupku izbora iz prethodnog stava dvije ili više kandidatkinja imaju jednak broj glasova, a broj osvojenih glasova nije dovoljan da sve budu izabrane ili imenovane u tijelo ili organ NS, izbor kandidatkinje se vrši sljedećim rasporedom:
- a) kandidatkinja manje zastupljenog spola;
 - b) kandidatkinja mlađa od 30 godine;
 - c) u slučaju nemogućnosti primjene kriterija iz tački a) i b), žrijebanjem će se odrediti izabrana ili imenovana članica.
- (8) U slučajevima razrješenja prije isteka mandata, izabrane članice organa NS-a, kao i imenovane članice u tijela NS-a, razrješavaju se na način koji je predviđen za njihov izbor ili imenovanje.
- (9) U slučaju kada članica organa ili tijela podnese neopozivu ostavku, nadležni organ prima je k znanju bez provođenja procedure predviđene u stavu 8. ovog člana.

Član 10.

(Pravovaljanost rada i odlučivanja)

- (1) Organi i tijela NS-a, kao i drugi organizacioni oblici NS-a, valjano odlučuju ako je prisutno više od polovine ukupnog broja članica dotičnog organa, tijela ili organizacionog oblika, osim u slučajevima kada je ovim Statutom drugačije određeno.
- (2) Organi i tijela NS-a, kao i organizacioni oblici NS-a, donose odluke natpolovičnom većinom glasova prisutnih članica, osim u slučajevima kada je ovim Statutom drugačije određeno.

Član 11.
(Načelo statutarnosti akata)

- (1) Svi akti organa i tijela NS-a moraju biti u skladu sa Statutom NS-a, a akti nižih organa i tijela NS-a moraju biti u skladu i sa aktima viših organa i tijela NS-a.
- (2) Svaka članica NS obavezana je pridržavati se odredbi Statuta i ostalih akata NS, te poštivati odluke nadležnih organa NS.
- (3) Sve odluke i akti nadležnih organa i tijela NS-a stupaju na snagu danom donošenja, osim ako u njima nije drugačije određeno.

Član 12.
(Načelo javnosti rada)

- (1) Rad organa i tijela NS-a je javan, a javnost rada ostvaruje se na javnim skupovima, tribinama, okruglim stolovima, izvještavanjem javnosti i članstva putem saopštenja, izjava, reagiranja, konferencija za medije, prisustvom predstavnica javnog informisanja na skupovima NS-a, te na druge prikladne načine.
- (2) Organi NS-a, izuzetno, mogu raspravljati i odlučivati bez obavješćavanja javnosti, i to u slučajevima kada se raspravlja o:
 - a) unutrašnjim kadrovskim pitanjima;
 - b) strategiji i taktici izborne kampanje i nominiranju kandidatkinja za izbore;
 - c) saradnji i spajanju, odnosno udruživanju s drugim političkim organizacijama;
 - d) poslovanju NS-a;
 - e) pitanjima koja se smatraju poslovnom tajnom, te
 - f) ostalim unutarstranačkim pitanjima i to na osnovu odluke nadležnog organa NS-a.

Član 13.
(Poslovna tajna)

- (1) Poslovnom tajnom NS-a smatraju se:
 - a) isprave i podaci o članicama NS-a, te dokumentacija o njihovom političkom djelovanju, podaci o donatorima NS-a, osim onih isprava, podataka i dokumenata za koje je Glavni odbor NS-a dao odobrenje za objavljivanje, a na osnovu prethodnog pristanka članice ili donatora ili onih isprava, podataka i dokumenata koje se objavljuju po sili zakona;
 - b) isprave i podaci o općem ili trenutnom finansijskom i drugom materijalnom stanju NS-a, osim onih isprava i podataka koje je NS dužna dostavljati nadležnim organima državne vlasti;
 - c) isprave, podaci i dokumentacija o drugim osobama ili institucijama s kojima sarađuje NS, a nalaze se u privremenom ili trajnom posjedu NS-a, osim onih za čiju objavu je Glavni odbor NS-a dao prethodno odobrenje ili onih isprava, podataka i dokumenata koje se objavljuju po sili zakona;

- d) isprave i podaci naznačeni kao poslovna tajna od strane drugih pravnih lica.
- (2) Poslovnom tajnom smatraju se i druge isprave i podaci vezani za rad i političko djelovanje NS-a čije bi objavljivanje bilo protivno interesima NS-a i uspješnom obavljanju službenih poslova, a o čemu odlučuje Glavni odbor NS-a.
- (3) Odluke o tome što se smatra poslovnom tajnom donose nadležni organi na svim nivoima organizacije NS-a.

II. ČLANSTVO

Član 14. (Vrste članstva)

- (1) Članstvo u NS-u može biti redovno i počasno.
- (2) Glavni odbor NS-a donosi Pravilnik o članstvu, kojim se detaljnije reguliraju sva pitanja vezana za članstvo u NS-u, posebno početak i prestanak članstva, vođenje Glavnog registra članstva i baze Kadrovske evidencije NS-a, te izgled i sadržaj stranačke pristupnice i iskaznice.
- (3) Sve članice NS-a dobijaju člansku iskaznicu.

Član 15. (Redovno članstvo)

- (1) Redovne članice NS-a s prebivalištem u Bosni i Hercegovini u pravilu su organizirane prema mjestu vlastitog prebivališta, odnosno u najbližem organizacionom obliku NS-a, ukoliko u mjestu prebivališta ne postoji organizacioni oblik NS-a (mjesna ili lokalna organizacija).
- (2) Redovno članstvo u NS-u moguće je pod jednakim uslovima svakoj punoljetnoj državljanke Bosne i Hercegovine, koja je upoznat/ sa Statutom i Programom NS-a i prihvća ih.
- (3) Redovnom članicom NS-a postaje se dobrovoljno, dostavljanjem popunjene pristupnice povjerenici NS-a u lokalnim odborima, ili neposredno u sjedištu NS ili popunjavanjem online pristupnice, nakon čega se članica upisuje u Glavni registar članica NS-a.
- (4) Redovna članica NS-a ne može istovremeno biti članica neke druge političke stranke sa sjedištem u Bosni i Hercegovini.

Član 16.
(Počasno članstvo)

- (1) Počasnom članicom može postati osoba koja u svom društvenom djelovanju podržava ideje za koje se zalaže NS i koja je svojim javnim istupima i neposrednim djelovanjem promovirala i podržavala NS u zemlji i inostranstvu.
- (2) Počasnom članicom može postati svaka osoba koja ispunjava uslove članstva, uz izuzetak da počasnom članicom može postati osoba koja je strani državljanin.
- (3) Počasne članice NS-a imaju sva prava redovnih članica, osim prava da biraju i budu birane, u skladu sa ovim Statutom.

Član 17.

(briše se)

Član 18.
(Članska prava i obaveze)

- (1) Članica NS-a ima pravo i obavezu:
 - a) sudjelovati u oblikovanju i ostvarivanju politike NS-a;
 - b) aktivno sudjelovati u radu organa i tijela NS-a u koja je izabrana, odnosno imenovana;
 - c) poštivati Statut i programska načela NS-a, te provoditi odluke nadležnih stranačkih organa;
 - d) redovno plaćati članarinu u skladu sa posebnim pravilnikom;
 - e) birati i biti birana u sve stranačke organe i tijela;
 - f) istaknuti kandidaturu i natjecati se u postupku izbora kandidatkinja na stranačkim listama za izbore u predstavničkim i izvršnim tijelima na svim nivoima državnog organizovanja u Bosni i Hercegovini,
 - g) biti obaviještena o stranačkim aktivnostima, stavovima i odlukama, te dobiti druge odgovarajuće informacije putem stranačkih glasila, stranačkih organa i drugim službenim kanalima;
 - h) na sastancima, odnosno sjednicama stranačkih organa i tijela javno i argumentirano iznositi prijedloge, mišljenja i kritike vezane uz rad NS-a i stranačkih organa i tijela;
 - i) Članice organa NS-a dužne su prisustvovati sjednicama lokalnih organizacija čijem zboru članstva pripadaju;
 - j) djelovati u skladu sa Etičkim kodeksom NS;
 - k) Kandidat koji je dva puta izabran sa kompenzacijske liste, uključujući sve izborne cikluse održane prije usvajanja ove odredbe, ne može više biti na kompenzacijskoj listi.

- (2) NS će poštovati sva prava i slobode garantovane Evropskom konvencijom za zaštitu ljudskih prava i temeljnih sloboda svim članicama unutar stranke i vezano za njihovo stranačko djelovanje.

Član 19. **(Prestanak članstva)**

Članstvo u NS-u prestaje:

- a) istupanjem iz članstva;
- b) isključenjem iz članstva;
- c) smrću.

Član 20. **(Istupanje iz članstva)**

Za istupanje iz članstva podnosi se pismena izjava, koja ne mora biti obrazložena, a Generalna sekretar NS-a, na zahtjev članice izdaje potvrdu o istupanju iz članstva u NS-u.

Član 21. **(Isključenje iz članstva)**

Iz NS-a se isključuje članica koja:

- a) ne poštuje Statut i Program NS-a, kao i druge opće i pojedinačne akte NS-a, te odluke koje donose nadležni organi i tijela NS-a u okviru svoje nadležnosti;
- b) ponašanjem, djelovanjem ili postupanjem nanosi veću štetu interesima ili ugledu pojedinog tijela NS-a ili NS-u u cjelini;
- c) u javnosti iznosi političke stavove koji su u suprotnosti sa Statutom i Programom NS-a, te odlukama nadležnih organa i tijela NS-a u okviru svoje nadležnosti;
- d) u javnim istupima učestalo vrijeđa ili kleveće drugu članicu NS-a;
- e) je prilikom učlanjenja u NS dala netačne ili neistinite podatke;
- f) nije platila članarinu u roku od 2 (dva) mjeseca od dana kada ju je nadležna zvaničnica NS-a pismeno upozorila da 6 (šest) mjeseci nije platila članarinu;
- g) ako članica izabrana u organe stranke u dužem vremenskom razdoblju, ne manjem od 3 (tri) i ne više od 6 (šest) mjeseci neopravdano nije aktivna u radu organa i tijela NS-a;
- h) kontinuirano odbija sudjelovanje u redovnim i vanrednim aktivnostima NS-a;
- i) se kandiduje na listi druge političke stranke, nezavisne liste ili kao nezavisna kandidatkinja bez saglasnosti Glavnog odbora;
- j) pređe u samostalne zastupnice odnosno vijećnice.
- k) su učlanjene u drugu političku organizaciju koja ima sjedište u BiH.

Član 22.

(briše se)

Član 23.

(Osnove stranačke discipline i disciplinskog postupka)

- (1) Glavni odbor NS donosi Pravilnik o provođenju disciplinskog postupka, kojim se podrobnije uređuju djelokrug, članstvo, način rada, postupak pred Etičkom komisijom i Predsjedništvom, vrste prekršaja osim onih propisanih članom 21. i disciplinske mjere za iste, te druga pitanja od važnosti za provođenje disciplinskog postupka.
- (2) Osnovu stranačke discipline predstavlja izvršenje dužnosti iz člana 18. ovog Statuta, te pridržavanje općih pravila pristojnog ponašanja.

III. ORGANI I STALNA TIJELA NS-A

Član 24.

(Organi NS-a)

Organi NS-a su:

- a) Kongres;
- b) Glavni odbor;
- c) predsjednica;
- d) Predsjedništvo;
- e) Nadzorni odbor;
- f) Etička komisija;

Član 25.

(Tijela NS-a)

- (1) Tijela NS-a čine:
- a) Interesni odbori/savjeti;
 - b) Odbor za Statut;
- (2) Glavni odbor donosi odluku o formiranju tijela NS-a.
- (3) Glavni odbor može, kada se za to ukaže potreba, donijeti odluku o formiranju i drugih tijela NS-a.

Član 26.

(Kongres NS-a)

- (1) Kongres NS-a je najviši organ NS-a.

- (2) Kongres NS-a, po svom karakteru i sadržaju, može biti redovni (izborni i izvještajno-tematski) i vanredni (izborni ili izvještajno-tematski);
- (3) Redovni kongres održava se svake 4 (četiri) godine, a obavezno u roku od 9 (devet) mjeseci od dana objavljivanja službenih rezultata Općih izbora u BiH.

Član 27.

(Sazivanje Kongresa NS-a)

- (1) Kongres NS-a saziva predsjednica NS-a ili Glavni odbor NS-a.
- (2) Ukoliko predsjednica ne sazove redovni Kongres najkasnije 75 dana prije isteka rokova iz člana 26, odluku o sazivanju Kongresa donosi Glavni odbor.
- (3) Organi iz st. 1. ovog člana donose odluku o sazivanju Kongresa koja obavezno sadrži:
 - a) datum, vrijeme i mjesto održavanja Kongresa;
 - b) broj delegatkinja Kongresa i način njihovog izbora;
 - c) sastav Odbora za organizaciju Kongresa;
 - d) naznaku bitnih pitanja koja će Kongres razmatrati u toku zasjedanja.
- (4) Akti iz stava 2. ovog člana dostavljaju se lokalnim i regionalni/kantonalnim odborima, Odboru za organizaciju Kongresa i Predsjedništvu NS-a, a najkasnije 60 (šezdeset) dana prije zakazanog dana održavanja Kongresa.
- (5) Poziv i materijali za Kongres dostavljaju se najmanje 30 (trideset) dana prije zakazanog dana održavanja redovnog Kongresa, a najmanje 15 (petnaest) dana prije zakazanog dana održavanja vanrednog Kongresa.
- (6) Odredbe ovog Statuta, kojima se uređuje način sazivanja, izbora delegatkinja, rad i odlučivanje na Kongresu NS-a, odnose se na sve kongrese navedene u stavu 2. člana 26. Glavni odbor NS-a može donijeti odluku o skraćivanju rokova za pripremu i organizaciju vanrednog kongresa propisanih ovim Statutom.

Član 28.

(Zahtjev za sazivanje Kongresa NS-a)

- (1) Predsjednica NS dužna je sazvati Kongres NS na zahtjev najmanje 5 (pet) regionalnih/kantonalnih odbora ili najmanje 10 (deset) lokalnih odbora.
- (2) Obrazloženi zahtjev iz stava 1. ovog člana podnosi se u pisanom obliku i sadrži prijedlog dnevnog reda sjednice Kongresa NS.
- (3) Kada predsjednica NS zaprimi zahtjev za sazivanje Kongresa NS, dužna je u roku od 30 (trideset) dana ispitati razloge za sazivanje Kongresa NS, zatražiti mišljenje Predsjedništva NS i sazvati Kongres.

(4) Ukoliko u roku iz stava (3) ovog člana predsjednica NS ne prihvati zahtjev za sazivanje Kongresa NS podnesen u skladu sa stavom (1) ovog člana, odluku o sazivanju Kongresa donosi Glavni odbor.

(5) U odluci o sazivanju određuje se vrsta Kongresa NS u skladu sa članom 26. Statuta NS.

Član 29. **(Sastav Kongresa NS-a)**

Kongres čine:

- a) predsjednica i tri potpredsjednice NS-a;
- b) članice Glavnog odbora, Predsjedništva, Nadzornog odbora i Etičke komisije NS-a;
- c) generalna sekretarka NS-a;
- d) predsjednice lokalnih odbora;
- e) predsjednice regionalnih/kantonalnih odbora;
- f) predsjednica Foruma mladih NS-a;
- g) izabrane predstavnice NS-a u općinskim i gradskim vijećima/skupštinama opština jedinica lokalne samouprave, općinske/opštinske načelnice, gradonačelnice i zamjenice, te zastupnice u državnim, entitetskim i kantonalnim zakonodavnim tijelima;
- h) imenovane ministrice i zamjenice ministrica koje su članice NS.
- i) izabrane predstavnice lokalnih organizacija NS-a, i to po jedna predstavница na svakih započelih 50 (pedeset) članica lokalne organizacije.

Član 30. **(Nadležnost Kongresa NS-a)**

Kongres je nadležan da:

- a) donosi Statut i Program NS-a;
- b) donosi Poslovnik o radu;
- c) donosi odluke, deklaracije i druge akte iz svoje nadležnosti;
- d) raspravlja i donosi odluku o prestanku rada NS-a ili njezinom udruživanju s drugim političkim strankama;
- e) utvrđuje opću politiku, smjernice i stajališta NS-a;
- f) razmatra i ocjenjuje cjelokupno djelovanje NS-a;
- g) raspravlja i prihvaća izvještaje o radu Glavnog i Nadzornog odbora NS-a;
- h) tajnim glasanjem razrješava i bira predsjednicu NS-a;
- i) tajnim glasanjem razrješava i bira tri potpredsjednice NS-a;
- j) tajnim glasanjem razrješava i bira članice Glavnog odbora NS-a,
- k) tajnim glasanjem razrješava i bira članice Nadzornog odbora NS-a;
- l) tajnim glasanjem razrješava i bira članice Etičke komisije NS-a;
- m) obavlja druge poslove utvrđene poslovníkom i Statutom.

Član 31.
(Način odlučivanja)

- (1) Kongres donosi pravovaljane odluke ukoliko zasjedanju prisustvuje natpolovična većina delegatkinja.
- (2) Kongres donosi pravovaljane odluke natpolovičnom većinom prisutnih delegatkinja.
- (3) Odluku o prestanku rada, spajanju s drugim političkim strankama, stupanju u međunarodna politička i nepolitička udruženja i izmjenama i dopunama Statuta NS-a, Kongres NS-a donosi dvotrećinskom većinom prisutnih delegatkinja Kongresa.
- (4) Ukoliko se glasa o više prijedloga koji se međusobno isključuju, usvojenim se smatra onaj prijedlog koji je dobio najviše glasova prisutnih delegatkinja Kongresa NS-a.

Član 32.
(Glavni odbor NS-a)

- (1) Glavni odbor NS-a je najviši organ NS-a između dva Kongresa.
- (2) Glavni odbor NS-a ima najmanje 29 članica, pri čemu ukupan broj članica Glavnog odbora NS-a mora biti neparan.
- (3) Glavni odbor NS-a čine:
 - a) predsjednica NS-a;
 - b) predsjednice regionalnih/kantonalnih odbora;
 - c) kantonalne predstavnice Foruma mladih NS-a;
 - d) najmanje 1/3 članica od ukupnog broja članica izabranih na Kongresu NS.
- (4) U slučaju prestanka mandata prijedlog kandidatkinja za članicu Glavnog odbora NS-a utvrđuje lokalni odbor, a potvrđuje ga Glavni odbor NS-a.
- (5) U slučaju promjene prebivališta, odnosno prelaska iz jednog lokalnog odbora u drugi, članica Glavnog odbora NS-a gubi svoj mandat, a lokalni odbor u ime kojeg je imala mandat ostvaruje pravo da kandidira drugu članicu Glavnog odbora NS-a.
- (6) Svaka lokalna organizacija koja je formirana između dva izborna Kongresa kandidira jednu članicu u Glavni odbor NS-a, koju na prijedlog Predsjedništva NS-a bira Glavni odbor NS-a.
- (7) U slučaju da joj iz bilo kog razloga prestane mandat, novu članicu bira Glavni odbor NS-a, a na inicijativu lokalne organizacije.
- (8) Glavni odbor NS-a može, na prijedlog Predsjedništva NS-a, donijeti odluku o kooptiranju do 10 članica Glavnog odbora NS-a.
- (9) Potrebno je uložiti najveće napore kako bi se u sastavu Glavnog odbora obezbijedila ravnopravna zastupljenost oba spola i zastupljenost najmanje 30% članica mlađih od 30 godina.

Član 33.
(Konstituiranje Glavnog odbora NS-a)

- (1) Glavni odbor NS-a se mora konstituirati u skladu sa Statutom najkasnije u roku od 30 (trideset) dana od dana održavanja Kongresa na kojem je izabran novi ili dopunjen postojeći saziv Glavnog odbora.
- (2) Konstituirajuću sjednicu novoizabranog Glavnog odbora NS-a saziva predsjednica NS-a.
- (3) Članice Glavnog odbora NS predlažu i između sebe biraju predsjednicu i pet potpredsjednica Glavnog odbora, pri čijem se izboru mora voditi računa o ravnomjernoj spolnoj, dobnoj i teritorijalnoj zastupljenosti.

Član 34.
(Sjednice Glavnog odbora NS-a)

- (1) Glavni odbor NS-a zasjeda najmanje četiri puta godišnje.
- (2) Sjednice Glavnog odbora NS-a saziva predsjednica Glavnog odbora NS-a, a u slučaju njene spriječenosti, potpredsjednica koju ona za to ovlasti.
- (3) Predsjednica Glavnog odbora NS-a dužna je sazvati sjednicu Glavnog odbora NS-a na prijedlog najmanje 1/5 (jedne petine) članica Glavnog odbora NS-a ili na osnovu zahtjeva Predsjedništva NS-a.
- (4) Ukoliko predsjednica Glavnog odbora NS-a ne sazove sjednicu u skladu sa stavom 3. ovoga člana, predsjednica NS-a saziva sjednicu Glavnog odbora bez odgode.
- (5) Na sjednice Glavnog odbora NS-a obavezno se poziva predsjednica Nadzornog odbora NS-a i Etičke komisije NS, koje nemaju pravo odlučivanja.

Član 35.
(Nadležnosti Glavnog odbora NS-a)

- (1) Glavni odbor NS-a:
 - a) odgovara za provođenje odluka Kongresa NS-a i politika NS-a;
 - b) donosi odluke i zaključke, te daje preporuke i smjernice Predsjedništvu NS-a;
 - c) razmatra i predlaže načine povezivanja i saradnje NS-a s drugim političkim ili nepolitičkim organizacijama, te donosi, između dva Kongresa NS-a, odluku o udruživanju sa drugim političkim strankama koja važi do konačne odluke Kongresa NS-a o ovom pitanju;
 - d) raspravlja i odlučuje o koalicijama NS-a;
 - e) donosi odluku o pristupanju međunarodnim političkim asocijacijama;
 - f) donosi odluku o postupku kandidiranja i izboru kandidatkinja za lokalne i opće izbore;

- g) utvrđuje kandidatkinje za sve nivoe vlasti i donosi Pravilnik o načinu kandidovanja i izboru kandidatkinja za opšte i lokalne izbore;
- h) donosi odluku o načinu formiranja i funkcioniranja tijela NS-a;
- i) zauzima politička stajališta o pitanjima iz djelokruga zastupničkih i izvršnih organa Bosne i Hercegovine, Federacije Bosne i Hercegovine, Republike Srpske, Brčko Distrikta BiH ;
- j) imenuje vršioce dužnosti predsjednice i potpredsjednica NS-a, kada im iz bilo kojeg razloga prestane mandat;
- k) imenuje do 5 (pet) članica Predsjedništva NS-a, na prijedlog predsjednice NS-a, a bira 5 (pet) članica Predsjedništva NS-a na prijedlog Glavnog odbora NS-a;
- l) utvrđuje kandidatkinje za izbor u organe NS-a koje bira Kongres NS-a;
- m) bira i razrješava predsjednicu i potpredsjednice Glavnog odbora NS, u skladu sa Statutom;
- n) na prijedlog Predsjedništva NS-a ili predsjednice Glavnog odbora bira u svoje članstvo do 10 (deset) članica NS-a;
- o) na prijedlog Predsjedništva NS-a donosi finansijski plan i usvaja zaključni finansijski izvještaj NS-a za prethodnu godinu;
- p) analizira i ocjenjuje izvještaj o vođenju predizborne kampanje, stranačke aktivnosti u kampanji i rezultate izbora na svim razinama;
- q) na zajedničkim sastancima, a najmanje dvaput godišnje, analizira rad poslanica NS-a u predstavničkim organima Federacije Bosne i Hercegovine, Republike Srpske, Brčko Distrikta BiH i Bosne i Hercegovine;
- r) raspravlja o svim pitanjima vezanim uz djelovanje NS-a, vodeći računa o stručnim analizama interesnih odbora/savjeta, te utvrđuje programske smjernice za pojedina područja političkog, ekonomskog i društvenog života;
- s) na prijedlog Predsjedništva NS-a utvrđuje iznos godišnje članarine i donosi Pravilnik o članstvu;
- t) donosi Etički kodeks NS-a;
- u) donosi Pravilnik o sastavu i načinu djelovanja interesnih odbora/savjeta NS-a;
- v) donosi Pravilnik o postupku kandidiranja i izboru organa NS-a;
- w) donosi Pravilnik o provođenju disciplinskog postupka;
- x) donosi i druge opće akte utvrđene ovim Statutom;
- y) donosi poslovnik o svom radu;
- z) na osnovu Pravilnika o nagrađivanju pojedincu i organizaciji dodjeljuje priznanja i nagrade za doprinose izgradnji, jačanju, afirmaciji i ostvarivanju programskih ciljeva NS-a;
- aa) provodi ankete članstva i raspisuje referendum članstva u skladu sa Pravilnikom o anketiranju i raspisivanju referenduma članstva NS;
- bb)u skladu sa statutom razrješava i imenuje članice Nadzornog odbora i Etičke komisije;
- cc) imenuje predsjedavajuću i članove privremenih radnih grupa za izradu nacрта političkih programa za lokalne i opće izbore.

dd) najmanje jednom godišnje organizuje posebnu sjednicu na kojoj raspravlja o temama od društvenog značaja te o istima zauzima politička stajališta, programske smjernice i usvaja zaključke.

ee) obavlja i druge poslove predviđene poslovníkom i Statutom.

(2) Glavni odbor NS-a donosi pravovaljane odluke natpolovičnom većinom prisutnih, ukoliko sjednici Glavnog odbora prisustvuje natpolovična većina ukupnog broja članica odbora.

Član 36.

(Prenos ovlasti i odlučivanje Glavnog odbora NS-a u izuzetnim situacijama)

(1) Glavni odbor NS-a može pojedine od svojih ovlasti, osim ovlaštenja navedenih u tačkama j), k), o), p), t) i bb) člana 35. ovog Statuta, prenijeti na Predsjedništvo NS, a najduže do konstituisanja idućeg saziva Glavnog odbora NS.

(2) Izuzetno, kada to izvanstranačke i unutarstranačke okolnosti zahtijevaju, Glavni odbor NS-a može, na prijedlog Predsjedništva NS-a uz prethodno pribavljeno mišljenje Odbora za Statut, donositi odluke sa statutarnom snagom, koje ne mogu umanjiti Statutom zajamčena prava svih članica NS-a.

(3) Odluke iz stava 2. ovog člana donose se dvotrećinskom većinom prisutnih članica, ukoliko sjednici Glavnog odbora NS-a prisustvuje natpolovična većina ukupnog broja članica. Tako donesene odluke podliježu procjeni i potvrdi prvog narednog Kongresa NS-a.

(4) Ukoliko Glavni odbor NS-a nije održao sjednicu duže od 6 (šest) mjeseci, tada Predsjedništvo NS-a može donositi odluke iz njegove nadležnosti i o donesenim odlukama informirati Glavni odbor NS-a na narednoj sjednici.

Član 37.

(Predsjednica NS-a)

(1) Predsjednica NS-a zastupa i predstavlja NS, te neposredno rukovodi aktivnostima na provođenju politika i programa NS-a, izvršavanjem i provođenjem odluka nadležnih organa NS-a, te odlučuje o tekućim poslovima vezanim za neposredno upravljanje strankom.

(2) Predsjednica NS-a može ovlastiti članicu pojedinog organa ili tijela NS-a da predstavlja i zastupa NS u određenim poslovima i aktivnostima (sudjelovanje na konferencijama i seminarima, sudjelovanje u pregovorima oko nekih pitanja od važnosti za NS i sl.).

(3) Generalna sekretarka pomaže predsjednici NS-a u izvršavanju obaveza iz stava 1. ovoga člana.

(4) Mandat predsjednice NS-a traje 4 (četiri) godine uz mogućnost ponovnog izbora, ali ukupno ne više od 8 (osam) godina.

- (5) U slučaju da NS na lokalnim ili opštim izborima ostvari slabije rezultate u odnosu na prethodne izbore na tim nivoima, predsjednica NS-a je dužna ponuditi ostavku o kojoj odlučuje Kongres NS-a ili Glavni Odbor NS-a. U slučaju da predsjednica NS-a u roku od 30 dana od dana objave konačnih rezultata ne ponudi ostavku, Glavni odbor NS-a je dužna u daljem roku od 30 dana otvoriti pitanje povjerenja predsjednici NS-a.
- (6) Predsjednica NS-a bira se na Kongresu, neposredno, tajnim glasanjem, te za svoj rad odgovara Kongresu NS-a i Glavnom odboru NS-a, između dva kongresa.
- (7) Način kandidiranja i izbora predsjednice NS-a regulisan je Pravilnikom o postupku kandidiranja i izboru organa NS-a.

Član 38.

(Nadležnost predsjednice NS-a)

Predsjednica NS-a:

- a) provodi politiku NS-a u skladu s programskim dokumentima, Statutom, odlukama i zaključcima nadležnih organa NS-a, te donosi izvršne političke odluke, zaključke, upute i druge akte;
- b) brine se i osigurava međusobnu saradnju svih organa i tijela NS-a;
- c) odgovara zajedno sa Predsjedništvom NS-a za finansijsko poslovanje NS-a u skladu sa zakonima Bosne i Hercegovine;
- d) predlaže do 5 (pet) članica za izbor u Predsjedništvo NS-a;
- e) saziva Kongres NS-a, u skladu sa Statutom;
- f) saziva Glavni odbor NS-a, ukoliko to ne učini predsjednica Glavnog odbora NS-a;
- g) predlaže Predsjedništvu NS-a donošenje odluke o raspuštanju lokalnih i regionalnih/kantonalnih odbora NS-a, te
- h) obavlja druge poslove u skladu sa Statutom.

Član 39.

(Potpredsjednica NS-a)

- (1) NS ima tri potpredsjednice čije polje djelovanja se može odnositi na političko djelovanje NS-a, na podršku i razvoj lokalnih i regionalnih/kantonalnih organizacija ili na međunarodne odnose i pitanja dijaspore, koje bira Kongres NS-a na mandat od 4 (četiri) godine uz mogućnost ponovnog izbora, ali ukupno ne više od 8 (osam) godina.
- (2) Potpredsjednice NS-a za svoj rad odgovaraju Kongresu NS-a, Glavnom odboru NS-a i predsjednici NS-a.
- (3) Na konstituirajućoj sjednici Predsjedništva NS-a, predsjednica NS-a zadužuje potpredsjednice NS-a za obavljanje poslova vezanih uz određena programska područja iz stava (1) ovog člana, odnosno za neposredno provođenje politike i političko djelovanje na međudržavnom, državnom, regionalnom i lokalnom nivou.

Član 40.
(Predsjedništvo NS-a)

- (1) Predsjedništvo NS-a je najviše izvršno-političko tijelo NS-a.
- (2) Predsjedništvo NS-a čine:
- a) predsjednica NS-a;
 - b) tri potpredsjednice NS-a;
 - c) predsjednica Glavnog odbora;
 - d) generalna sekretarka;
 - e) predstavica Forum mladih NS-a;
 - f) do 10 (deset) članica koje imenuje Glavni odbor NS-a, od kojih 5 (pet) predlaže predsjednica NS-a, a 5 (pet) članica/ca Glavni odbor, pri čemu ukupan broj članica Predsjedništva NS-a mora biti neparan.
- (3) Prije utvrđivanja prijedloga članica Predsjedništva NS-a koje predlaže, predsjednica NS-a je dužna konsultovati se sa potpredsjednicama NS-a i osigurati regionalnu zastupljenost i ravnopravnu zastupljenost spolova.

Član 41.
(Sjednice Predsjedništva NS-a)

- (1) Sjednice Predsjedništva NS-a održavaju se prema potrebi, a najmanje jednom mjesečno.
- (2) Sjednice Predsjedništva NS-a saziva i njima predsjedava predsjednica NS-a, a u slučaju njene spriječenosti, sjednicom predsjedava jedna od potpredsjednica NS-a koju za to ovlasti predsjednica NS-a. U slučaju duže odsutnosti predsjednice NS-a, sjednicama Predsjedništva NS-a predsjedavaju potpredsjednice NS-a naizmjenično.
- (3) Predsjednica Nadzornog odbora NS-a se poziva na sjednice Predsjedništva NS-a.
- (4) Predsjednica je dužna sazvati sjednicu Predsjedništva NS na zahtjev dvije potpredsjednice ili 1/3 članica Predsjedništva NS. Ako to ne uradi u roku od sedam dana od upućivanja takvog zahtjeva, sjednicu saziva jedna ili više potpredsjednica.
- (5) Članice Predsjedništva NS-a dužne su prisustvovati sjednicama Predsjedništva NS-a.

Član 42.
(Način odlučivanja)

- (1) Predsjedništvo NS-a donosi pravovaljane odluke natpolovičnom većinom prisutnih članica ukoliko sjednici prisustvuje većina od ukupnog broja članica Predsjedništva NS-a.
- (2) Odluke Predsjedništva NS-a obavezuju sve niže organe i tijela NS-a, koja su ih dužna provoditi bez odgađanja.

Član 43.
(Nadležnost Predsjedništva NS-a)

Predsjedništvo NS-a:

- a) provodi Program NS-a, odluke Kongresa NS-a i Glavnog odbora NS-a;
- b) raspravlja o potrebi izmjena Programa, Statuta i pravilnika, te utvrđuje njihov nacrt;
- c) kreira i provodi politiku međunarodne suradnje;
- d) koordinira rad regionalnih/kantonalnih organizacija, te radi na jačanju organizacijske strukture i efikasnom provođenju politike i Programa NS-a;
- e) najmanje jednom u šest mjeseci organizuje posebnu sjednicu na kojoj raspravlja o temama od društvenog značaja te o istima zauzima politička stajališta, programske smjernice i usvaja zaključke.
- f) donosi odluku o raspuštanju lokalnih i regionalnih/kantonalnih odbora;
- g) imenuje koordinaticu rada interesnih odbora/savjeta NS-a;
- h) osniva i druga tijela u skladu sa Statutom;
- i) razrješava i bira generalnu sekretarku NS-a;
- j) osmišljava i organizira provođenje političkih i poslovnih aktivnosti NS-a;
- k) organizira i brine se o odnosima NS-a s javnošću,
- l) imenuje glasnogovornicu i utvrđuje djelokrug njenog rada;
- m) imenuje središnji izborni štab NS-a;
- n) radi na organizacionom jačanju stranke i brine se o informiranosti članstva;
- o) pribavlja sredstva, organizira i brine se za materijalno i finansijsko poslovanje i potrebe NS-a;
- p) podnosi Glavnom odboru godišnji izvještaj o svom radu;
- q) predlaže Glavnom odboru NS-a finansijski plan za narednu godinu i podnosi završni račun za tekuću godinu;
- r) predlaže Glavnom odboru NS-a iznos godišnje članarine i način njenog prikupljanja;
- s) daje mišljenje o svim aktima i dokumentima koje drugi organi ili tijela NS-a predlažu Glavnom odboru na razmatranje i usvajanje;
- t) upravlja imovinom NS-a i odgovara za njezino korištenje u skladu sa zakonima Bosne i Hercegovine;
- u) brine se o zaštiti i upotrebi arhivske građe i drugih dokumenata;
- v) donosi odluke koje nisu u nadležnosti drugih organa NS-a, u skladu sa Statutom;
- w) donosi poslovnik o svom radu;
- x) predlaže Glavnom odboru kandidatkinje za izbor poslanica i delegatkinja u predstavničke organe Bosne i Hercegovine, uključujući kandidatkinje za izbor u Predsjedništvo BiH, Federacije Bosne i Hercegovine, Republike Srpske i Brčko Distrikta BiH.
- y) daje saglasnost za liste kandidatkinja za sve nivoe vlasti predložene od lokalnih i regionalnih/kantonalnih odbora;
- z) obavlja i druge poslove u skladu s poslovníkom, Statutom i odlukama viših organa NS-a.

Član 44.
(Nadzorni odbor NS-a)

- (1) Nadzorni odbor NS ima 5 (pet) članica koje, u skladu s ovim Statutom, bira Kongres na mandat od 4 (četiri) godine.
- (2) Prilikom biranja kandidatkinja u Nadzorni odbor NS-a, najmanje jedna kandidatkinja mora biti pravne struke i najmanje jedna kandidatkinja mora biti ekonomske struke.
- (3) Članice Nadzornog odbora NS ne mogu biti članice Predsjedništva NS, Glavnog odbora NS, Etičke komisije NS-a, predsjednice i potpredsjednice regionalnih/kantonalnih odbora i lokalnih odbora.
- (4) Nakon izbora članica Nadzornog odbora NS, predsjednica NS saziva konstituirajuću sjednicu Nadzornog odbora NS na kojoj članice između sebe biraju predsjednicu Nadzornog odbora NS i donose pravilnik o radu, u skladu sa Statutom.
- (5) Glavni odbor može između dva Kongresa zamijeniti neaktivnu članicu Nadzornog odbora ili članicu koja podnese ostavku.
- (6) Predsjednica Nadzornog odbora NS-a se poziva na sjednice Glavnog odbora NS-a.
- (7) Nadzorni odbor NS za svoj rad odgovara Kongresu NS.
- (8) Generalna sekretarka NS dužna je pružiti organizacijsku i administrativnu podršku Nadzornom odboru NS.

Član 45.
(Nadležnost Nadzornog odbora NS-a)

- (1) Nadzorni odbor NS:
 - a) nadzire zakonitost i statutarost rada svih organa i tijela NS, a osobito njihovo materijalno i finansijsko poslovanje;
 - b) daje mišljenje na sve izvještaje o finansijsko-materijalnom poslovanju, koji se podnosi Predsjedništvu NS, Glavnom odboru NS ili Kongresu NS;
 - c) na zahtjev članica, organa ili tijela NS donosi mišljenje o tome da li su organi, tijela i teritorijalne organizacije NS postupile shodno članu 4. stav (6);
 - d) u slučaju uočenih nepravilnosti, Nadzorni odbor NS, bez odgađanja i u pisanom obliku, izvještava predsjednicu NS i Predsjedništvo NS, te poziva dotični organ da odmah ispravi uočene nepravilnosti;
 - e) donosi odluke Nadzornog odbora iz okvira statutarne nadležnosti, koje, uz obavezno pribavljeno mišljenje Odbora za statut, postaju obavezujuće.
- (2) Predsjednica Nadzornog odbora NS-a obavezno se poziva na sjednice Glavnog odbora NS-a.
- (3) Svaki izvještaj o finansijsko-materijalnom poslovanju, koji se podnosi Predsjedništvu NS-a, Glavnom odboru NS-a ili Kongresu NS-a, mora imati i mišljenje Nadzornog odbora NS-a.

- (4) U slučaju uočenih nepravilnosti, Nadzorni odbor NS-a će o istome, bez odgađanja i u pisanom obliku, izvijestiti predsjednicu NS-a i Predsjedništvo NS-a, te pozvati dotični organ da odmah ispravi uočene nepravilnosti.

Član 46.
(Etička komisija NS-a)

- (1) Etička komisija NS-a ima 5 (pet) članica koje, u skladu sa ovim Statutom, bira Kongres NS-a na mandat od 4 (četiri) godine.
- (2) Prilikom biranja kandidatkinja u Etičku komisiju NS-a, najmanje jedna kandidatkinja mora biti pravne struke.
- (3) Glavni odbor može između dva Kongresa zamijeniti neaktivnu članicu Etičke komisije ili članicu koja podnese ostavku.
- (4) Članice Etičke komisije NS-a ne mogu biti članice Nadzornog odbora NS-a, Predsjedništva NS-a ili Glavnog odbora NS-a.
- (5) Predsjednica NS-a saziva konstituirajuću sjednicu Etičke komisije NS-a na kojoj članice između sebe biraju predsjednicu Etičke komisije i donose pravilnik o radu, u skladu sa Statutom.
- (6) Predsjednica Etičke komisije NS se poziva na sjednice Glavnog odbora NS.
- (7) Generalna sekretarka NS-a dužna je pružiti organizacijsku i administrativnu podršku Etičkoj komisiji NS-a.

Član 47.
(briše se)

Član 48.
(Interesni odbori/savjeti)

- (1) Članice NS-a mogu se unutar stranke organizirati i prema interesnoj osnovi u interesne odbore/savjete.
- (2) Interesni odbori/savjeti svoj rad temelje na političkim načelima NS-a i djeluju s ciljem aktiviranja članica i simpatizerki NS-a, koje dijele iste ili slične interese (ekonomija, kultura, politički sistem, obrazovanje, nauka, socijalna zaštita, ekologija, zaštita marginaliziranih skupina, sigurnost i sl.).
- (3) Odluku o osnivanju interesnih odbora/savjeta donosi nadležni izvršni organ NS-a, ovisno o razini teritorijalne organizacije NS-a za koju se interesni odbor/savjet osniva.
- (4) Broj članica u pojedinom interesnom odboru/savjetu nije ograničen, a članice pojedinog interesnog odbora/savjeta između sebe biraju predsjednicu odbora, te donose poslovnik o radu, u skladu sa Statutom.

- (5) Interesni odbori/savjeti prate društveno-političke događaje, te analiziraju i predlažu inicijative i rješenja bitnih pitanja iz svih područja života Bosne i Hercegovine (političkog, ekonomskog, socijalnog, odbrambenog, ekološkog, demografskog itd.).
- (6) Nadležni organi NS-a prilikom usvajanja programa i planova rada na svim nivoima organiziranja NS-a uzimaju u obzir i stavove i mišljenja interesnih odbora/savjeta.
- (7) Predsjedništvo NS-a, u skladu sa Statutom, može imenovati koordinatoricu za rad interesnih odbora/savjeta NS-a.

Član 49.

(Generalna sekretarka NS-a)

- (1) Generalnu sekretarku NS-a bira Predsjedništvo NS-a na prijedlog predsjednice NS-a, na mandat od 4 (četiri) godine s mogućnošću reizbora.
- (2) Generalna sekretarka NS-a za svoj rad odgovara Predsjedništvu NS-a.

Član 50.

(Nadležnost generalne sekretarke NS-a)

- (1) Generalna sekretarka NS-a:
 - a) organizira i koordinira rad organa i tijela NS-a;
 - b) zadužena je i odgovorna za unapređenje organizacijske stranačke strukture i unutarstranačke komunikacije;
 - c) odgovara za organiziranje izvršenja odluka predsjednice NS-a, Predsjedništva NS-a, Glavnog odbora NS-a i Nadzornog odbora NS-a;
 - d) odgovorna je za provođenje Statuta i drugih odluka organa i tijela NS-a;
 - e) odgovara Predsjedništvu NS-a za rad Sekretarijata NS-a;
 - f) učestvuje u pripremi i radu organa i tijela NS-a, te priprema i osigurava organizacione, materijalne i tehničke uslove za njihov rad;
 - g) organizira i koordinira poslovanje NS-a, naročito materijalno-finansijsko;
 - h) dužna je u slučaju uočene potrebe pismeno ukazati bilo kojem organu ili tijelu NS-a da postupa suprotno odredbama Statuta, općim aktima ili odlukama organa NS-a;
 - i) donosi odluke i obavlja druge poslove u skladu sa Statutom i odlukama viših organa NS-a.
- (2) Generalna sekretarka NS-a može, uz prethodnu suglasnost Predsjedništva NS-a, sazvati sjednicu bilo kojega tijela NS-a, ukoliko ocijeni da je sazivanje sjednice neophodno.
- (3) U slučajevima duže odsutnosti ili spriječenosti generalne sekretarke NS-a, Predsjedništvo NS-a imenuje između svojih članica osobu koja će obavljati poslove generalne sekretarke za vrijeme njene odsutnosti.

Član 51.
(Sekretarijat Naše stranke)

- (1) Za potrebe obavljanja stručnih, administrativnih i tehničkih poslova NS-a, Predsjedništvo osniva Sekretarijat NS-a.
- (2) Na prijedlog generalne sekretarke NS, Predsjedništvo NS donosi pravilnik o organizaciji Sekretarijata NS, kojim se uređuje njegov rad, utvrđuje broj administrativnog i drugog stručnog osoblja potrebnog za njegov nesmetani rad, iznos plaće i drugih naknada, kao i detaljan opis poslova i radnih zadataka za svaku članicu administrativnog i drugog stručnog osoblja angažovanog za potrebe NS.
- (3) Osoblje Sekretarijata za svoj rad odgovara direktno generalnoj sekretarki NS, koja o tome redovno izvještava Predsjedništvo NS.
- (4) Predsjedništvo NS podnosi Glavnom odboru NS izvještaj o aktivnostima, troškovima, organizaciji i svim drugim detaljima vezanim za Sekretarijat najmanje jedanput godišnje.
- (5) Sekretarijat NS pruža stručnu, administrativnu, tehničku i drugu pomoć, u skladu sa opisom poslova i radnih zadataka, svim izabranim i imenovanim članicama NS na svim nivoima vlasti u Bosni i Hercegovini.

Član 51a.
(Politička direktorica)

- (1) Političku direktoricu NS bira i razrješava Predsjedništvo NS na prijedlog predsjednice NS.
- (2) Politička direktorica NS za svoj rad odgovara Predsjedništvu NS.

Član 51b.
(Nadležnost političke direktorice)

Politička direktorica:

- a) prati ostvarivanje osnovnih principa organizacionog i političkog djelovanja organa i tijela NS, te predlaže Predsjedništvu NS mjere i aktivnosti za unapređenje stanja;
- b) prati ostvarivanje programskih političkih ciljeva i predlaže Predsjedništvu mjere za intenziviranje političkih aktivnosti;
- c) sudjeluje u radu Predsjedništva i Glavnog odbora, bez prava glasa;
- d) koordinira rad Predsjedništva i klubova zastupnica/vijećnica;
- e) prati političko djelovanje organizacijskih oblika NS;
- f) prati stanje unutarstranačkih odnosa i predlaže mjere za njihovo unapređenje;
- g) prati javno mnijenje i predlaže mjere za bolje pozicioniranje NS;
- h) prati politički rejting drugih političkih aktera i priprema elemente za projekciju realnih izbornih ciljeva;

- i) predlaže teme za posebne sjednice iz Člana 35. stav (1) tačka cc) i Člana 43. stav (1) tačka e);
- j) obavlja druge poslove u skladu sa Statutom i odlukama organa NS.

IV. TERITORIJALNA ORGANIZACIJA NS-a

Član 52.

(Opća načela organizacije)

NS je organizirana na teritorijalnom principu.

Član 53.

(Teritorijalna organizacija stranke)

Teritorijalnu organizaciju NS-a čine:

- a) lokalne organizacije,
- b) regionalne/kantonalne organizacije.

Lokalna organizacija

Član 54.

(Područje i način osnivanja lokalne organizacije)

- (1) Lokalna organizacija je osnovna organizaciona jedinica NS-a koja se osniva za područje jedne općine ili grada.
- (2) Za osnivanje lokalne organizacije NS-a nužno je 9 (devet) članica NS-a.
- (3) Zapisnik sa osnivanja lokalne organizacije dostavljaju se Sekretarijatu NS-a.

Član 55.

(Rad lokalne organizacije)

Lokalna organizacija djeluje samostalno u skladu sa Statutom i Programom NS-a, deklaracijama i odlukama viših organa i tijela NS-a, promovišući ciljeve i načela rada NS-a, te ostvaruje programsku politiku NS-a neposrednim djelovanjem svojih članica.

Član 56.
(Nadležnost lokalne organizacije)

- (1) Organi lokalne organizacije odlučuju o međustranačkim dogovorima o saradnji i zajedničkim nastupima na izborima za područje dotične jedinice lokalne samouprave, a u skladu s općom politikom NS-a i uz saglasnost Predsjedništva NS i Glavnog odbora NS.
- (2) Na području jedinice lokalne samouprave, organi lokalne organizacije samostalno sastavljaju prijedloge lista kandidatkinja NS-a za općinske načelnice, gradonačelnice, za izbore u predstavničke organe jedinice lokalne samouprave, te predlažu kandidatkinje za izbore članica predstavničkih organa na ostalim nivoima vlasti u skladu sa Statutom i odlukama organa NS-a o postupku kandidiranja, uz saglasnost Predsjedništva NS-a.
- (3) Predsjedništvo NS-a, uz konsultacije s neposredno nadređenom regionalnom organizacijom NS-a, može sastaviti prijedloge lista kandidatkinja i zamjenica kandidatkinja iz stava 2. ovog člana, i to isključivo u slučaju da organi lokalne organizacije to ne učine u zadatom roku, ili ukoliko je organ lokalne organizacije raspušten ili ne postoji.
- (4) U slučaju postojanja razlika u stavovima o pitanjima iz stava 1. i 2. ovog člana između lokalnih organa i Predsjedništva NS-a, tada konačnu odluku o tim pitanjima donosi Glavni odbor NS-a.

Član 57.
(Načelo pripadnosti lokalnoj organizaciji)

- (1) Svaki članica NS-a obavezno pripada jednoj od lokalnih organizacija NS-a prema mjestu prebivališta.
- (2) U općinama i gradovima u kojima ne postoji lokalna organizacija, članice NS-a pripadaju lokalnoj organizaciji u najbližoj jedinici lokalne samouprave.
- (3) U slučaju promjene prebivališta i boravišta, članica se putem Sekretarijata NS-a odjavljuje u matičnoj lokalnoj organizaciji i prijavljuje se u lokalnu organizaciju novog prebivališta, te se uključuje u njezin rad.
- (4) Kada članica NS-a duže vrijeme boravi izvan područja svog prebivališta tada se ona uključuje u rad lokalne organizacije u mjestu boravišta.
- (5) Organ lokalne organizacije može osnivati i vlastite ogranke na području mjesne samouprave u svojoj jedinici lokalne samouprave.

Član 58.
(Organ lokalne organizacije)

- (1) Organ lokalne organizacije NS-a je općinski odbor ili gradski odbor (u nastavku teksta lokalni odbor).

- (2) Lokalni odbor bira zbor članstva lokalne organizacije. Zbor članstva saziva predsjednica ili povjerenica lokalnog odbora.
- (3) Predsjedništvo NS-a može izvršiti reizbor lokalnog odbora:
- a) ukoliko izabrani lokalni odbor ne zasjeda u potrebnom kvorumu najmanje tri uzastopne sjednice;
 - b) ukoliko izabrani lokalni odbor ne šalje redovno izvještaje o radu kantonalnoj/regionalnoj organizaciji i Sekretarijatu NS-a;
 - c) ukoliko izabrani lokalni odbor ne provodi odluke viših organa stranke.
- (4) Kada se steknu uslovi za održavanje zbora članstva onda, u skladu sa odredbama Statuta, zbog članstva bira lokalni odbor umjesto onoga kojeg je izabralo Predsjedništvo NS-a.

Član 59.

- (1) Lokalni odbor donosi, u skladu s ovim Statutom, poslovnik o svome radu.
- (2) Lokalni odbor NS-a može osnivati i druga tijela u skladu sa Statutom i političkim načelima NS-a.

Lokalni odbor

Član 60.

(Sastav lokalnog odbora)

- (1) Lokalni odbor čine:
- a) predsjednica;
 - b) dvije potpredsjednice;
 - c) sekretarka, uz njenu saglasnost;
 - d) izabrane načelnice, gradonačelnice kao i njihove zamjenice, te vijećnice u vijeću/predstavničkom tijelu lokalne samouprave;
 - e) najmanje 5 (pet) članica pri čemu ukupan broj članica lokalnog odbora mora biti neparan.
- (2) Članice iz stava 1. ovoga člana, sa izuzetkom sekretarke, bira zbor članstva lokalne organizacije (općine ili grada). U slučajevima iz člana 30. ovog Statuta ili u slučaju da nije moguće održati Zbor članstva, odluku o imenovanju članica lokalnog odbora donosi Predsjedništvo NS-a.
- (3) Lokalni odbor na prijedlog predsjednice odbora bira i razrješava sekretarku koja je članica stranke. Izabrana sekretarka postaje članica lokalnog odbora.
- (4) Izuzetno, na prijedlog predsjednice, lokalni odbor može kooptirati do 1/3 (jedne trećine) dodatnih članica u odnosu na postojeći broj članica lokalnog odbora uz prethodnu saglasnost regionalnog/kantonalnog odbora NS-a. Ukoliko nije formiran

regionalni/kantonalni odbor na području date općine odluku o kooptiranju donosi Predsjedništvo NS-a.

- (5) Potrebno je uložiti najveće napore kako bi sastav lokalnog odbora činilo najmanje 30% članica mlađih od 30 godina i kako bi se osigurala ravnopravna zastupljenost oba spola.
- (6) Članice lokalnog odbora su dužni prisustvovati sjednicama odbora.

Član 61. **(Sjednice lokalnog odbora)**

- (1) Sjednice lokalnog odbora održavaju se najmanje jednom mjesečno i saziva ih predsjednica lokalnog odbora.
- (2) Na zahtjev najmanje 1/3 (jedne trećine) članica lokalnog odbora, predsjednica je dužna sazvati sjednicu odbora u roku od 15 (petnaest) dana od dana zaprimanja zahtjeva.
- (3) Obrazloženi zahtjev iz stava 2. ovoga člana podnosi se u pisanom obliku i sadrži prijedlog dnevnoga reda sjednice lokalnog odbora.
- (4) Ukoliko predsjednica lokalnog odbora ne sazove sjednicu u skladu sa stavom 2. ovoga člana, predsjednica nadređenog regionalnog/kantonalnog odbora NS-a dužna je, u istom roku, sazvati sjednicu lokalnog odbora.
- (5) Ukoliko predsjednica regionalnog/kantonalnog odbora ne sazove, u ostavljenom roku, sjednicu lokalnog odbora, tada Predsjedništvo NS-a donosi odluku o sazivanju sjednice.
- (6) Zahtjev za sazivanje sjednice lokalnog odbora mogu uputiti i regionalni/kantonalni odbor i Predsjedništvo NS-a.
- (7) Ukoliko na zahtjev iz stava 6. ovog člana predsjednica lokalnog odbora ne sazove sjednicu, tada odluku o sazivanju sjednice donosi regionalni/kantonalni odbor, odnosno Predsjedništvo NS-a, u zavisnosti od toga na čiji zahtjev se sjednica saziva.
- (8) Sjednicama lokalnog odbora predsjedava predsjednica, a u slučaju spriječenosti zamjenjuje je potpredsjednica lokalnog odbora kojeg ona ovlasti. U slučaju dužeg odsustva predsjednice, sjednicama predsjedavaju potpredsjednice naizmjenično.
- (9) Ukoliko predsjednica lokalnog odbora podnese ostavku, funkciju vršioca dužnosti predsjednice preuzima potpredsjednica koju imenuje lokalni odbor i obavlja je do izbora nove predsjednice.

Član 62. **(Nadležnost lokalnog odbora i način odlučivanja)**

- (1) Lokalni odbor:
 - a) provodi odluke Kongresa NS-a i drugih nadležnih organa i tijela NS-a;

- b) daje političke ocjene i utvrđuje političke stavove o pitanjima i pojavama na području na kojima djeluje;
- c) upravlja lokalnom organizacijom između izbora;
- d) osmišljava i organizira djelovanje i provođenje politike NS-a, izvršenje programa, te programskih načela i ciljeva na području na kojem djeluje;
- e) podstiče omasovljenje članstva;
- f) osniva tijela i interesne odbore i koordinira njihov rad;
- g) sastavlja prijedlog lista kandidata, te organizira i provodi izbornu kampanju za izbore općinske načelnice, odnosno gradonačelnice i njihovih zamjenica, te članica predstavničkog tijela u općini/jedinici lokalne samouprave;
- h) odlučuje o koalicijama u svojoj jedinici lokalne samouprave u skladu sa programskim načelima NS-a uz prethodno pribavljeno mišljenje regionalnog/kantonalnog odbora i saglasnost Predsjedništva NS-a;
- i) organizira i podstiče dodatno obrazovanje članica lokalne organizacije;
- j) najmanje jednom u pola godine razmatra rad svojih članica u organima jedinice lokalne samouprave i radnim tijelima iste;
- k) utvrđuje kandidatkinje za tijela NS-a;
- l) podstiče i organizira promotivne aktivnosti, te organizira odnose s javnošću;
- m) bira i razrješava sekretarku lokalnog odbora;
- n) većinom glasova prisutnih razrješava članicu vlastite općinske ili gradske organizacije ili iz matične organizacije delegirane članice kantonalne/regionalne organizacije u slučaju tri vezana izostanka ili u slučaju da ista u toku jedne kalendarske godine bude prisutna na manje od 50% sjednica općinske/gradske ili regionalne/kantonalne organizacije, izuzev ako izostanak može opravdati;
- o) donosi odluku o formiranju mjesnih odbora i sprovodi realizaciju formiranja mjesnih odbora;
- p) predlaže kandidatkinje za lokalne izbore;
- q) donosi poslovnik o svom radu;
- r) obavlja druge poslove predviđene poslovníkom, Statutom i odlukama viših organa i tijela NS-a.

(2) Lokalni odbor pravovaljane odluke donosi natpolovičnom većinom prisutnih, ukoliko sjednici prisustvuje natpolovična većina ukupnog broja članica odbora.

Regionalna organizacija

Član 63.

(Regionalne organizacije)

(1) Regionalne organizacije NS-a su u RS i distriktu Brčko.

(2) Regionalna organizacija Banja Luka-Prijedor: Krupa na Uni, Novi Grad, Kozarska Dubica, Prijedor, Gradiška, Laktaši, Srbac, Prnjavor, Petrovac, Oštra Luka, Banja Luka, Čelinac,

Istočni Drvar, Ribnik, Mrkonjić Grad, Jezero, Skender Vakuf, Kotor Varoš, Šipovo, Kupres (RS) i Kostajnica.

- (3) Regionalna organizacija Doboj-Bijeljina: Derventa, Brod, Vukosavlje, Šamac, Donji Žabar, Modriča, Pelagićevo, Bijeljina, Doboj, Petrovo, Lopare, Stanari, Ugljevik i Teslić.
- (4) Regionalna organizacija Istočna Bosna: Osmaci, Zvornik, Šekovići, Vlasenica, Bratunac, Srebrenica, Sokolac, Han Pijesak, Istočna Ilidža, Istočni Stari Grad, Istočno Novo Sarajevo, Trnovo (RS), Pale (RS), Rogatica, Višegrad, Istočni Mostar, Nevesinje, Kalinovik, Gacko, Foča (RS), Novo Goražde, Čajniče, Rudo, Berkovići, Ljubinje, Bileća, Trebinje i Milići.
- (5) Regionalna organizacija Brčko Distrikt Bosne i Hercegovine : Brčko Distrikt BiH.
- (6) Kantonalni odbori NS-a su u FBiH:
 - a) Kantonalni odbor: Unsko-sanski kanton;
 - b) Kantonalni odbor: Kanton 10;
 - c) Kantonalni odbor: Tuzlanski kanton;
 - d) Kantonalni odbor: Posavski kanton;
 - e) Kantonalni odbor: Zeničko-dobojski kanton;
 - f) Kantonalni odbor: Srednjobosanski kanton;
 - g) Kantonalni odbor: Kanton Sarajevo;
 - h) Kantonalni odbor: Bosansko-podrinjski kanton;
 - i) Kantonalni odbor: Hercegovačko-neretvanski kanton;
 - j) Kantonalni odbor: Zapadnohercegovački kanton.
- (7) Odlukom Predsjedništva iz funkcionalnih i interesnih razloga, kantonalni odbori se mogu objediniti u pripadajuću regionalnu organizaciju.

Član 63a.

(Gradski odbor Grada Sarajeva)

- (1) Izuzetno od članica 58, 60 i 62 Statuta NS, na području Grada Sarajeva formira se Gradski odbor Grada Sarajeva.
- (2) Gradski odbor Grada Sarajeva čine:
 - a) Vijećnice u Gradskom vijeću Grada Sarajeva;
 - b) Gradonačelnica i dogradonačelnice Grada Sarajeva;
 - c) Načelnice općina sa prostora Grada Sarajeva i
 - d) Šefice klubova vijećnica u općinskim vijećima sa prostora Grada Sarajeva.
- (3) Gradski odbor Grada Sarajeva u skladu s ovim Statutom, donosi poslovnik o svom radu.
- (4) Predsjednica Gradskog odbora Grada Sarajeva je predsjednica Kluba vijećnica Naše stranke u Gradskom vijeću Grada Sarajeva.
- (5) Zamjenica Predsjednice Gradskog odbora Grada Sarajeva je zamjenica predsjednice Kluba vijećnika Naše stranke u Gradskom vijeću Grada Sarajeva.

- (6) Članice Gradskog odbora Grada Sarajeva dužne su prisustvovati sjednicama odbora.
- (7) Članice Gradskog odbora Grada Sarajeva ne mogu u isto vrijeme biti članice Kantonalnog odbora Kantona Sarajevo.

Član 63b.

(Sjednice Gradskog odbora Grada Sarajeva)

- (1) Sjednice Gradskog odbora Grada Sarajeva se održavaju prije svake sjednice Gradskog vijeća Grada Sarajeva, a saziva ih predsjednica Gradskog odbora Grada Sarajeva.
- (2) Na zahtjev najmanje 1/3 (jedne trećine) članica Gradskog odbora Grada Sarajeva, predsjednica je dužna sazvati sjednicu odbora u roku od 15 (petnaest) dana od dana zaprimanja zahtjeva.
- (3) Obrazloženi zahtjev iz stava 2. ovoga člana podnosi se u pisanom obliku i sadrži prijedlog dnevnog reda sjednice Gradskog odbora Grada Sarajeva.
- (4) Ukoliko predsjednica ne sazove sjednicu u skladu sa stavom 2. ovog člana, predsjednica kantonalnog odbora Kantona Sarajevo dužna je, u istom roku, sazvati sjednicu Gradskog odbora Grada Sarajeva.
- (5) Ukoliko predsjednica kantonalnog odbora Kantona Sarajevo u ostavljenom roku ne sazove sjednicu Gradskog odbora Grada Sarajeva, tada Predsjedništvo NS donosi odluku o sazivanju sjednice.
- (6) Sjednicama Gradskog odbora Grada Sarajeva predsjedava predsjednica Gradskog odbora Grada Sarajeva, a u slučaju spriječenosti zamjenjuje je zamjenica predsjednice Gradskog odbora Grada Sarajeva.

Član 63c.

(Nadležnosti i način odlučivanja Gradskog odbora Grada Sarajeva)

- (1) Gradski odbor Grada Sarajeva:
- a) provodi odluke Kongresa NS i drugih nadležnih organa i tijela NS;
 - b) daje političke ocjene i utvrđuje političke stavove o pitanjima i pojavama na području na kojem djeluje;
 - c) osmišljava i organizira djelovanje i provođenje politike NS, izvršenje programa te programskih načela i ciljeva na području na kojem djeluje;
 - d) odlučuje o koalicijama u svojoj jedinici lokalne samouprave u skladu s programskim
 - e) načelima NS uz prethodno pribavljeno mišljenje regionalnog/kantonalnog odbora i saglasnost Predsjedništva NS;
 - f) podstiče i organizira promotivne aktivnosti te organizira odnose s javnošću;
 - g) donosi poslovnik o svom radu;
 - h) obavlja druge poslove predviđene poslovníkom, Statutom i odlukama viših organa i tijela NS.

- (2) Gradski odbor Grada Sarajeva pravovaljane odluke donosi natpolovičnom većinom prisutnih ukoliko sjednici prisustvuje natpolovična većina ukupnog broja članica odbora.

Član 64.

(Nadležnost regionalne organizacije)

- (1) Regionalna organizacija djeluje samostalno u skladu sa Statutom i Programom NS-a, te odlukama viših organa i tijela NS-a, promovišući ciljeve i načela rada NS-a, te izražava posebne interese područja na kojem djeluje i provodi programsku politiku NS-a, neposrednim djelovanjem svojih članica.
- (2) Regionalna organizacija odlučuje o međustranačkim dogovorima o saradnji i zajedničkim nastupima na izborima na području svog djelovanja u skladu s općom politikom NS-a i uz saglasnost Predsjedništva NS-a i Glavnog odbora NS-a.
- (3) Regionalna organizacija predlaže kandidatkinje koji će se kandidirati na općim izborima u BiH u skladu sa ovim statutom i odlukama organa NS-a o postupku kandidiranja.
- (4) Regionalna organizacija daje mišljenje na, od strane lokalnih organizacija, predložene kandidatkinje.
- (5) Predsjedništvo NS-a može sastaviti liste, te predložiti kandidatkinje i zamjenice kandidatkinja iz stava 3. ovoga člana jedino u slučaju da regionalna organizacija ne postoji ili da je regionalni/kantonalni odbor raspušten ili da regionalni/kantonalni odbor u ostavljenom roku nije izvršio ovu obavezu.

Član 65.

(Organ regionalne organizacije)

- (1) Organ regionalne organizacije je regionalni/kantonalni odbor.
- (2) Regionalni/kantonalni odbor ima najmanje 7 (sedam) članica, pri čemu ukupan broj članica regionalnog/kantonalnog odbora mora biti neparan.
- (3) Svaka lokalna organizacija bira najmanje jednu članicu regionalnog/kantonalnog odbora.
- (4) Regionalni/kantonalni odbor čine:
 - a) predsjednica regionalnog/kantonalnog odbora;
 - b) dvije potpredsjednice;
 - c) sekretarka;
 - d) zastupnice u kantonalnim skupštinama;
 - e) članice regionalnog/kantonalnog odbora koje su birali lokalni odbori;
 - f) imenovane članice kantonalnih vlada iz redova Naše stranke.

- (5) Predsjednicu, potpredsjednice bira regionalni/kantonalni odbor iz reda svojih članica koje ne mogu biti predsjednice, potpredsjednice u općinama u kojima imaju prebivalište/boravište, niti mogu biti iz iste lokalne organizacije.
- (6) Regionalni/kantonalni odbor na prijedlog predsjednice odbora, iz reda članica stranke, bira i razrješava sekretarku.
- (7) Sekretarka nema pravo glasa, ukoliko nije izabrana za članicu regionalnog/kantonalnog odbora ispred lokalne organizacije.
- (8) Potrebno je uložiti najveće napore kako bi sastav regionalnog/kantonalnog odbora činilo najmanje 30% članica mlađih od 30 godina i kako bi se osigurala ravnopravna zastupljenost oba spola.
- (9) Iznimno, na prijedlog predsjednice, regionalni/kantonalni odbor može kooptirati do 1/3 (jedne trećine) dodatnih članica u odnosu na postojeći broj članica regionalnog/kantonalnog odbora uz prethodnu saglasnost Predsjedništva NS-a.
- (10) Članice regionalnog/kantonalnog odbora dužne su prisustvovati sjednicama odbora.
- (11) U slučaju da iz bilo kojeg razloga nije moguće izvršiti izbor članica regionalnog/kantonalnog odbora, Predsjedništvo NS-a postavlja članice regionalnog/kantonalnog odbora.
- (12) Regionalni/kantonalni odbor donosi, u skladu s ovim Statutom, poslovnik o svome radu. Regionalni/kantonalni odbor može osnivati i regionalna tijela NS-a u skladu sa ovim Statutom i političkim načelima NS-a.

Član 66.

(Sjednice regionalnog/kantonalnog odbora)

- (1) Sjednice regionalnog/kantonalnog odbora održavaju se najmanje jednom mjesečno. Sjednice regionalnog/kantonalnog odbora saziva predsjednica.
- (2) Na zahtjev najmanje 1/3 (jedne trećine) članica regionalnog/kantonalnog odbora, predsjednica je dužna sazvati sjednicu u roku od 15 (petnaest) dana od dana zaprimanja zahtjeva.
- (3) Obrazloženi zahtjev iz stava 2. ovoga člana podnosi se u pisanom obliku i sadrži prijedlog dnevnoga reda sjednice.
- (4) Ukoliko predsjednica ne sazove sjednicu regionalnog/kantonalnog odbora u skladu sa stavom 2. ovoga člana, onda Predsjedništvo NS-a saziva sjednicu.
- (5) Predsjedništvo NS-a ima pravo zahtijevati održavanje sjednice regionalnog/kantonalnog odbora i predložiti dnevni red. Ukoliko predsjednica ne zakaže sjednicu koja treba da se održi roku od 15 dana od dana prijema zahtjeva, onda će sjednicu regionalnog/kantonalnog odbora zakazati Predsjedništvo NS-a.

- (6) Ukoliko sjednica regionalnog/kantonalnog odbora nije održana 3 (tri) mjeseca, onda Predsjedništvo NS-a ima obavezu da zakaže sjednicu koja će se održati najkasnije u roku od 30 (trideset) dana od dana isteka roka od 3 (tri) mjeseca.
- (7) Sjednicama predsjedava predsjednica, a u slučaju spriječenosti zamjenjuje je potpredsjednica koju ona ovlasti. U slučaju dužeg odsustvovanja predsjednice, sjednicama regionalnog/kantonalnog odbora predsjedavaju potpredsjednice naizmjenično.
- (8) Ukoliko predsjednica regionalnog/kantonalnog odbora podnese ostavku, funkciju vršiteljice dužnosti predsjednice preuzima potpredsjednica koju imenuje regionalni/kantonalni odbor i obavlja je do izbora nove predsjednice.

Član 67.

(Nadležnost regionalnog/kantonalnog odbora)

- (1) U ostvarivanju svoje funkcije regionalni/kantonalni odbor:
- a) osmišljava i organizira djelovanje i provođenje politike NS-a, izvršenje programa i programskih načela i ciljeva na nivou regionalne organizacije;
 - b) provodi Statut i druge odluke nadležnih organa i tijela NS-a;
 - c) daje političke ocjene i utvrđuje političke stavove o stanju na području na kojem djeluje i šire;
 - d) koordinira i usmjerava rad lokalnih organizacija, te podstiče osnivanje novih lokalnih organizacija i njihovih ogranaka, u skladu sa Statutom i odlukama nadležnih organa i tijela NS-a;
 - e) podstiče omasovljenje članstva;
 - f) osniva različite interesne odbore i druga tijela i koordinira njihov rad;
 - g) bira predsjednicu, potpredsjednice;
 - h) predlaže kandidatkinje i njihove zamjenice, te organizira i nadzire provođenje izborne kampanje za predstavničke organe jedinica regionalne samouprave s područja dotične regionalne organizacije;
 - i) odlučuje o koalicijama u jedinicama regionalne samouprave s područja dotične regionalne organizacije u skladu sa politikom NS-a i uz saglasnost Predsjedništva NS-a;
 - j) razmatra i daje mišljenje o prijedlozima lokalnih odbora o koalicijama u jedinicama lokalne samouprave, a u skladu sa načelima NS-a;
 - k) najmanje jednom u pola godine razmatra rad svojih članica u organima jedinica regionalne vlasti s područja dotične regionalne organizacije;
 - l) predlaže kandidatkinje za izbor poslanica u predstavničke organe Distrikta Brčko i entiteta Bosne i Hercegovine;
 - m) utvrđuje prijedloge kandidatkinja za organe NS-a;
 - n) podstiče i organizira promotivne aktivnosti, te organizira odnose s javnošću na području djelovanja dotične regionalne organizacije;

- o) raspravlja i zauzima stajališta o iznimno važnim političkim pitanjima iz rada lokalnih organizacija i ogranaka sa svog područja;
- p) dostavlja Predsjedništvu NS-a godišnje izvještaje o radu i plan rada za narednu godinu;
- q) usvaja finansijski izvještaj za prethodnu godinu. Sastavni dio izvještaja regionalnog/kantonalnog odbora su i finansijski izvještaji lokalnih odbora;
- r) donosi poslovnik o svom radu;
- s) obavlja i druge poslove predviđene poslovníkom, Statutom i odlukama viših organa i tijela NS-a.

(2) S ciljem unapređivanja organizacije i efikasnosti rada lokalnih organizacija i ogranaka, regionalni/kantonalni odbor može osnivati koordinacijska tijela o čemu donosi posebnu odluku.

(3) Regionalni/kantonalni odbor donosi pravovaljane odluke natpolovičnom većinom prisutnih, ukoliko sjednici prisustvuje natpolovična većina ukupnoga broja članica odbora.

V. MANDAT IZABRANIH ORGANA, TIJELA I DUŽNOSNICA

Član 68.

(Trajanje mandata)

Članice svih izabranih organa i tijela NS-a i izabrane dužnosnice NS-a biraju se na period od 4 (četiri) godine, ukoliko Statutom nije drugačije predviđeno.

Član 69.

(Imenovanje vršioca dužnosti predsjednice NS-a i potpredsjednica NS-a)

(1) U slučaju da predsjednica NS-a iz bilo kojeg razloga prestane obavljati svoju funkciju, Glavni odbor NS-a između potpredsjednice NS-a imenuje vršiteljicu dužnosti predsjednice NS-a čiji mandat traje do narednog Kongresa NS-a.

(2) U slučaju da potpredsjednica NS-a iz bilo kojeg razloga prestane obavljati svoju funkciju, Glavni odbor NS-a imenuje, na prijedlog predsjednice NS-a, vršiteljicu dužnosti potpredsjednice čiji mandat traje do narednog Kongresa NS-a.

VI. Odbor za statut

Član 70.

(Odbor za Statut)

(1) Glavni odbor NS-a imenuje Odbor za Statut, na prijedlog predsjednice NS-a, kao stalno tijelo NS-a.

- (2) Odbor za Statut ima 5 (pet) članica, od kojih su najmanje 3 (tri) članice pravne struke.
- (3) Članice Odbora za Statut biraju se na mandat od 4 (četiri) godine s mogućnošću reizbora.
- (4) Članice Odbora za Statut između sebe biraju predsjednicu Odbora za statut i donose poslovnik o svome radu, u skladu sa Statutom.
- (5) Odbor za Statut izrađuje nacрте Statuta, odnosno nacрте izmjena i/ili dopuna Statuta, te na zahtjev organa, tijela ili pojedinih članica NS daje prijedlog autentičnog tumačenja odredbi Statuta koje je po usvajanju od strane Glavnog odbora obavezujuće za sve članice NS-a.
- (6) Odbor za Statut donosi ocjenu usklađenosti svih poslovnika i drugih opštih akata sa Statutom, a na pismeni zahtjev bilo kojega organa, tijela ili člana NS-a.

Član 71. **(Javna rasprava o nacrtu Statuta)**

- (1) Odbor za Statut utvrđuje radnu verziju teksta Statuta i upućuje ga Predsjedništvu NS-a na izjašnjenje.
- (2) Predsjedništvo NS-a utvrđuje Nacrt statuta i upućuje ga lokalnim i regionalnim/kantonalnim organizacijama u javnu raspravu koja traje minimalno 21 dan.
- (3) Nakon obavljene javne rasprave Predsjedništvo NS-a utvrđuje Prijedlog statuta i dostavlja ga Glavnom odboru NS-a.
- (4) Glavni odbor NS-a potvrđuje Prijedlog statuta i dostavlja ga Kongresu NS-a na razmatranje i usvajanje.
- (5) Postupak za izmjene i dopune Statuta identičan je postupku njegovog donošenja.
- (6) Odbor za Statut izrađuje prednacрте izmjena i/ili dopuna Statuta po potrebi.
- (7) Odbor za Statut donosi ocjenu usklađenosti svih poslovnika i drugih opštih akata sa Statutom, a na pismeni zahtjev bilo kojeg organa, tijela ili članice NS.

VII. FORUM MLADIH NS-A

Član 72. **(Forum mladih NS-a)**

- (1) Forum mladih NS-a je organizacioni oblik NS koji okuplja članice NS do 30 godina.
- (2) Forum mladih NS-a donosi Pravilnik o radu kojim se definira način djelovanja, organizovanja, nadzor i koordinacija djelovanja Foruma mladih NS-a.
- (3) Predsjedništvo NS-a odobrava poslovnik Pravilnik o radu Foruma mladih NS-a.

VIII. KLUBOVI ZASTUPNIKA/CA, DELEGATKINJA I VIJEĆNIKA/CA

Član 73.

(Načelne odredbe)

- (1) Zastupnice, delegatkinje i vijećnice iz NS izabrane u predstavničke organe organizuju se u klubove koji djeluju u okviru organa u koje su izabrani, u skladu sa zakonom i aktima tih organa.
- (2) Klubovi obavezno razmatraju sva pitanja koja su na dnevnom redu sjednica predstavničkih organa, utvrđuju stavove i pokreću inicijative u skladu sa politikom NS-a i opštim interesom društvene zajednice.
- (3) Zastupnice, delegatkinje i vijećnice NS mogu formirati klubove sa članicama drugih političkih stranaka ili nezavisnim zastupnicama, delegatkinjama i vijećnicama, uz saglasnost Predsjedništva NS.
- (4) Klubovi biraju predsjednicu i zamjenicu predsjednice uz saglasnost Predsjedništva NS-a.
- (5) Stručnu, administrativnu i tehničku pomoć klubovima pruža sekretarka kluba, kao i sekretarijat NS.
- (6) Klubovi, odnosno izabrane predstavnice NS-a tamo gdje nije formiran klub, dužne su organu na istom nivou političko-teritorijalne organizacije NS-a podnijeti izvještaj o svom radu najmanje dva puta godišnje. Nadležni organ NS-a ima pravo zahtijevati podnošenje izvještaja o radu klubova, odnosno predstavnica kada to ocjeni cjelishodnim.
- (7) Nadležni organi su dužni na prijedlog kluba, ili izabrane predstavnice NS-a razmatrati pitanja i zauzimati stavove o temama koje će biti na dnevnom redu predstavničkog organa, te pružati svaku drugu pomoć klubovima, odnosno izabranim predstavnicama NS-a.

IX. IMOVINA I FINANSIRANJE NS-A

Član 74.

(Imovina NS-a)

- (1) NS može imati nekretnine i pokretnine.
- (2) Odluku o kupovini nekretnina i načinu njihova raspolaganja donosi Glavni odbor NS-a.
- (3) Odluku o kupovini pokretnina (uredska oprema, motorna vozila i sl.) i načinu njihova raspolaganja donosi Predsjedništvo NS-a.
- (4) Odluku o materijalnom poslovanju i drugim novčanim ulaganjima donosi Predsjedništvo NS-a.

- (5) Odluku o nabavci uredskog materijala neophodnog za nesmetano funkcioniranje Sekretarijata NS-a, kao i drugog potrebnog materijala za nesmetani rad organa NS-a, donosi generalna sekretarka NS-a.

Član 75. (Finansiranje)

- (1) NS se finansira prihodima od:
- a) članarine;
 - b) budžetskih sredstava onih organa u kojima ima zastupnice, odnosno delegatkinje;
 - c) donacija;
 - d) drugih izvora u skladu sa zakonom.
- (2) Način rada i upravljanja finansijama NS-a će se urediti Pravilnikom o finansijskom poslovanju.

Član 76. (Planiranje i izvještavanje)

Generalna sekretarka NS-a vodi računa o pravovremenoj pripremi izvještaja o finansijskom poslovanju za tekuću i finansijskom planu za narednu godinu.

X. NAČIN PRESTANKA RADA STRANKE I RASPODJELA IMOVINE

Član 77.

- (1) NS prestaje s radom u skladu sa zakonom.
- (2) Odluku o prestanku rada NS-a donosi Kongres NS-a.
- (3) U izuzetnim slučajevima, odluku o prestanku rada može donijeti i Glavni odbor NS-a, na prijedlog Predsjedništva NS-a.
- (4) Odluka o prestanku rada NS-a obavezno sadrži odredbu kojom se utvrđuje krajnji korisnik imovine NS-a.

XI. PRELAZNE I ZAVRŠNE ODREDBE

Član 78.

- (1) Ovaj Statut stupa na snagu i primjenjuje se danom donošenja.

- (2) Organi i tijela NS-a, kao i organizacijski oblici NS-a dužni su uskladiti sve svoje akte i dokumente s odredbama Statuta na svojoj prvoj narednoj sjednici, a najkasnije u roku od 6 (šest) mjeseci od dana donošenja Statuta.

Član 79.

Danom stupanja na snagu ovoga Statuta prestaje važiti tekst Statuta donesen na 3. Kongresu NS-a od 16.05.2015. godine.